

Gimzyienzdog Ginghcuz:

Minghhoengh Yisuz Daegbieg Gag Miz

京族独弦琴独特的艺术魅力

□ Lauxdog Cinz Yen



▲ Lauxsae naihsim son lwg-hag hag danzgvit gimzyienzdog.

◀ Gimzyienzdog vuengz daiq lwglwg lanlan danzgvit sing go ndei dingq.

▲ Bouxswnjcienz gimzyienzdog Yenj Cicwngz son dahlan danzgvit gimzyienzdog.

Youq Ginghcuz Samdaui Guengjsae raeuz, beixnuengx Ginghcuz binaengz gvaqciat, angq hoh fungsou roxnaeuz diuqfoux ciengqgo, cungj haengj aeu gimzyienzdog danzgvit guhbuenx, caemhcaiq haujlai vunz cungj rox danzgvit gimzyienzdog. Bi 2011 ndwen 8, Dunghhingh Ginghcuz Gimzyienzdog yisuz ndaej lied haeuj le buek daihsam guekgya feihvuzciz vwnzva yizcanj baujhoh mingzloeg.

Gimzyienzdog youq ndawbiengz Ginghcuz heuhguh gimzbeuz, roxnaeuz gimzbeuz yienzdog, dwg cungj yozgi ndawbiengz ciuhgeq Ginghcuz ndeu, gaenq miz 400 lai bi lizsij, youq ranghdieg Ginghcuz Samdaui Gyanghbingz Cin Dunghhingh Si riuzcienz hwnghoengh. Gimzyienzdog gij daegsaeq ceiq yienhda de dwg aen de gienjdan hoeng gij sing diuzbuj de danz okdaej haenx fagbyau nanwt, yaemdiuh lai yiengh, yaemsaeq singisag, ndei dingq yinx vunz. Boggimz aeu mbokfaexcuk bag aq yungh mbiengj hung guhbaenz roxnaeuz aeu geij gep benjfaex hab baenz habraez guhbaenz, raez sam cik, ciggingq seiq conq baenzneix, mbiengj haibak hoemj coh baihlaj,

gyaeuj he ding diuz dingciem ndeu cugndaet yienzgimz, gyaeuj he cix siuq congq iq ndeu baek gep faexcuk na he guh ganjngauz; yienzgimz caenh miz diuz dog, ciuhgeq aeu cagndaij roxnaeuz diuzduk guh yienz, diuzyienz gyaeuj ndeu cug gwnz dingciem gyaeujgvaz boggimz ndaetndiq, gyaeuj he cug youq gwnz diuz ganjngauz gyaeujswix boggimz. Danzgvit biujyienj seiz, fwngzgvaz gaem gyamqsae' gyap roxnaeuz gep faexcuk iq dinj ndeu danzgvit yienzgimz, hawj de fat ok gij singyaem saenqrwd haenx, fwngzswix doengzseiz gaem ngauz ganjngauz, hawj singyaem rwenzred sang daemq bienqvaq gyoebbaenz yaemwenq.

Gimzyienzdog riengzdwk vwnzmingz ciuhneix hwnghat caemh ciemhciemh ndaej gajcaenh, cugboub demgya le gungyienz caeuq aenhapgug yiengh lwggyoux, caiq hwnghat baenz aen gimzyienzdog ciuhneix. Aen sigij gonq roekcib nienzdaih co, Dunghhingh Minzcuz Gohvujdonz seizhaenx, hainduuj bae soucomz cingjeix bujgo Ginghcuz, hawj gij yaemgo gimzyienzdog aeu bak ciengq rwz dingq doxcienz haenx baez daih'it miz le baenz dauq bujgo,

vih gimzyienzdog ndaej baij hwnj daizheiq hung biujyienj caux diuzgienh ndei. Gyoengq canghyienj lij ginggvaq fanfoek sawqniemh, aeu faexnding, faexgyaemq roxnaeuz faexgvang dingjlauh mbokfaexcuk guh baenz boggimz, aeu gaeuvaiz dingjlauh gep faexcuk dinj guh ganjngauz, doengzseiz youq gwnz yienzgimz cang le aenribyaem, hawj de bienqbaenz le gimzyienzdog singdienh, gij sing engq hung cienz ndaej engq gyae, baenzneix yaemsaeq gimzyienzdog couh bienq ndaej engq unqnemq ndeidingq, singyaem engq singisag rwenzred, engq seprwz, engqgya ndaej daengz vunzlai haengjgyaez.

Bae yawj bae dingq gimzyienzdog biujyienj, caenh raen bouxyienj fwngzgvax danzgvit fwngzswix ngauznod ganjngauz le, gij sing gimz ndei dingq rwenzred couh cienz okdaej, mwngz ndaej youq ndaw yaemgo mbouj doxdoengz haenx maezmwd: Roxnaeuz rumz swnh raemx dingh, aenmbwn gvangqlangh; roxnaeuz raemxlangh fan hwnj gienj roengz, langh laeng gyaep langh gonq; roxnaeuz gij cingz unq gvaq raemxsaw, hopheux yinx vunz……



▲ Aen gimzyienzdog seizneix yiengh ndei yawj sing engq hung.



▲ Bouxhek angqvauvau sawq danzgvit gimzyienzdog.



▲ Cej nuengx doq danzgvit gimzyienzdog doq ciengq go Ginghcuz.



▲ Gimzyienzdog buenx danz baijyienj fungsug Ginghcuz.



▲ Laux nyaeq doxgap yienj danzgvit gimzyienzdog.